

16 Mac 2016

KENYATAAN MEDIA

oleh Dato' Ir. Jaseni Maidinsa,

Ketua Pegawai Eksekutif,

PBA Holdings Bhd (PBAHB) dan

Perbadanan Bekalan Air Pulau Pinang Sdn Bhd (PBAPP)

BERTENANG DAN JIMAT AIR: PULAU PINANG BELUM DI DALAM ZON BAHAYA

PULAU PINANG, Rabu, 16/3/2016: Taburan hujan agak kurang sejak 30 hari lalu di Pulau Pinang dengan suhu siang hari mencecah 35°C. Bagaimanapun, ia masih belum mencapai tahap krisis air atau catuan air di negeri ini.

Sejak suku keempat 2015, Perbadanan Bekalan Air Pulau Pinang Sdn Bhd (PBAPP) telah melaksanakan program bagi mengelak catuan air ketika musim "Super El Niño" tahun 2016 ini. Inisiatif inisiatif utama kami termasuk:

- Memastikan kapasiti efektif Empangan Air Itam dan Empangan Teluk Bahang adalah setinggi mungkin pada akhir tahun lepas. Pada 1 Januari 2016, kapasiti efektif Empangan Air Itam dan Empangan Teluk Bahang masing-masing adalah 89.3% dan 84.2%.
- Mengoptimumkan simpanan empangan Pulau Pinang dengan pengambilan air sekurang yang mungkin daripada empangan setiap hari, agar Pulau Pinang mempunyai simpanan air empangan yang lebih daripada mencukupi untuk jangka masa lebih lama ketika musim panas dan kering ini.
- Mempertingkatkan pengambilan air dari Sungai Muda untuk pengrawatan di Loji Rawatan Air Sungai Dua (LRA Sungai Dua).
- Mempertingkatkan pengeluaran LRA Sungai Dua untuk menghasilkan lebih banyak air terawat setiap hari. Sejak 2015, loji ini menghasilkan lebih kurang 900 juta liter air terawat setiap hari

untuk memenuhi keperluan harian bekalan air di Pulau Pinang.

- Mengepam air dari LRA Sungai Dua pada tekanan lebih tinggi agar mampu sampai di semua kawasan di tanah besar, dan di daerah Barat Daya Pulau Pinang.
- Mempercepatkan kerja-kerja pembaikan paip pecah yang mungkin disebabkan oleh tekanan pengepaman yang lebih tinggi.
- Memantau paras air Sungai Muda, sumber air mentah utama kita, 24/7. Jika terdapat sebarang kekurangan, terdapat perjanjian bahawa Kementerian Tenaga, Teknologi Hijau dan Air (KeTTHA) akan meminta Kedah untuk melepaskan air ke Sungai Muda seperti diperlukan oleh Pulau Pinang disebabkan penghentian Empangan Mengkuang untuk membolehkan kerja-kerja naik taraf bernilai RM1.2 bilion dilaksanakan oleh KeTTHA.

Semua inisiatif ini menunjukkan PBAPP proaktif dalam perancangan awal untuk mengelakkan catuan, dengan memanfaatkan keupayaan infrastruktur air sedia ada di Pulau Pinang sepenuhnya.

BEKALAN AIR TERKINI

Oleh sebab itu:

1. Pulau Pinang masih belum mencapai tahap risiko krisis air atau catuan air.
2. Kapasiti efektif empangan adalah mencukupi untuk bertahan sehingga hujan pada April 2016 nanti.

Kapasiti efektif Empangan Air Itam berada pada tahap 75.7%. Empangan ini mempunyai air yang mencukupi untuk bertahan sehingga 74 hari bekalan air tanpa hujan.

Kapasiti efektif Empangan Teluk Bahang adalah 72.3%, dan mencukupi untuk bertahan selama 220 hari tanpa hujan.

Paras air Sungai Muda adalah pada tahap 2.41 meter. Walaupun paras air menurun, PBAPP masih mampu untuk mengekstrak kira-kira 1 bilion liter setiap hari daripada sungai ini untuk

rawatan di LRA Sungai Dua.

3. PBAPP akan dapat menyediakan bekalan air yang baik dan berterusan di seluruh negeri sehingga hujan pada bulan April.

BERTENANG DAN JIMAT AIR

Secara ringkasnya, boleh dikatakan Pulau Pinang masih belum berada di zon bahaya.

Walau bagaimanapun, PBAPP ingin menyeru semua penduduk Pulau Pinang dan perniagaan yang berpangkalan di Pulau Pinang untuk bertenang, jimatkan air dan menggunakan air dengan bijak.

Oleh itu, PBAPP ingin menasihatkan semua pengguna air di Pulau Pinang untuk melakukan dua perkara asas dan mudah dengan segera:

- Elakkan menggunakan hos seboleh mungkin untuk aktiviti-aktiviti pembersihan. Hos membazirkan air.
- Kurangkan kekerapan membasuh kereta dan motosikal. Elakkan menggunakan hos dalam apa cara juga.

Untuk tip-tip jimat air selanjutnya, sila lawati www.pba.com.my

Terima kasih.

*Dato' Ir. Jaseni Maidinsa,
Ketua Pegawai Eksekutif,
PBA Holdings Bhd (PBAHB) dan
Perbadanan Bekalan Air Pulau Pinang Sdn Bhd (PBAPP)*

Hubungi : Puan Syarifah Nasywa bt Syed Feisal Barakbah
Corporate Communications Unit
Tel : 04-200 6607
Email : syarifah@pba.com.my